

11. november 2015

Meeqqat suli atualinngitsut perorsaanikkut inerikkiartuutaasunik ulluunerani neqeroorutitut pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa anguniarlugu, Meeqqat suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni nr. 16, 3. december 2012-imeersumi § 5-ip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Demokraatit)

Inatsisartunut ilaasortap Tillie Martinussen-ip siunnersuutaanut Siumumiit ima oqaaseqassaagut.

Angajoqqaat mikisunik meerartallit pitsaanerpaanik atugassaqartinneqarnissaat isumannaasallugu inuiaqatigiinni suliassat pingaarnerpaat ilagaat. Siunnersuuteqartup ujartuiffigaa perorsaanikkut inerikkiartuutaasunik ulluunerani neqeroorutitut pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa.

Nalunngilarput illoqarfanni nuttarfiunerusuni ajornartorsiut atuuttoq, angajoqqaat meerartaareernerup kingorna ulloq suliffik siulleq nalliuttarmat suli meeraq ulluunerani paaqqutari-neqarnissaannut inissamik innersuunneqanngitsoq. Tamatumallu malitsigisarpaa angajoqqaat pisortat avaqqullugit meeqqaminnik paarsisinnaasunik ujartuisarnerat.

Inatsit matumani siunnersuuteqartumit allannguiffigineqarniarloq Inatsisartut inatsisaanni nr. 16, 3 december 2012-meersuuvoq. Inatsisillu § tallimaat immikkoortoq 1 ima oqaasertaqarpoq, soorlu aamma taanna Naalakkersuisup erseqqissareeraa: Kommunit naammattunik ulluunerani neqerooruteqarnissaq tamatumani qularnaarinissamik pisussaaffeqartut.

Siunnersuuteqartup anguniagaa paasilluarparput, Naalakkersuisulli akissutaanni takuneqarsinnaavoq inatsimmi Kommunit ulluunerani neqerooruteqartussaanagerat naqissuserneqareersoq. Tamatuminngalu malititsisinnaannginneq ilaatigut Kommunit aningaasaqarniarneranut kiisalu sulisussanik tamakkiisumik qularnaarisinnaannginnermi inissisimasoq.

Taamaattumik siunnersuuteqartup oqariartuutigisai paasilluaraluarlugit Naalakkersuisut akis-sutaanni tunngavilersuutigineqartut paasilluarlugit siunnersuutip itigartinneqarnissaa Siumu-miit innersuussutigaarput.

Vivian Motzfeldt

Siumut